



Claude WISELER
President vun der
Chamber vun den Deputéierten
19, um Krautmaart
L-1728 Lëtzebuerg

Lëtzebuerg, den 24/10/2024

Här President,

Sou wéi den Artikel 80 vun eisem Chambersreglement et virgesäit, bieden ech lech, dës parlamentaresch Fro un d'Ministesch fir Gesondheet weiderzeleeden.

D'Obesitéit ass eng ëmmer méi grouss Erausforderung fir eis Gesellschaft a steet a staarker Verbindung mat anere Krankheeten, wéi zum Beispill Diabetes. Am Mäerz 2024 gouf zu Lëtzebuerg de Projet Dataspace4Health lancéiert, deen sech als Zil gesat huet, den Austausch vu Gesondheetsdaten sécher a konform ze gestalten. Dëse Projet konzentréiert sech ënner anerem op Diabetes als ee vun de Schwéierpunkten. Gläichzäiteg hunn de Rot vun der Europäescher Unioun an d'Europäescht Parlament am Mäerz 2024 eng provisoresch Eenegung iwwer eng Veruerdning fir en European Health Data Space (EHDS) fonnt.

An dësem Kontext ass et wichteg ze verstoen, wéi dës Initiativen zesummespillen an d'Gesondheetsversuerung zu Lëtzebuerg beaflossen, besonnesch a Beräicher wéi Obesitéit a Diabetes. Dobäi stellen sech Froen iwwer d'Sammlung, d'Späicherung an d'Notzung vu Gesondheetsdaten, grad ewéi iwwer de Schutz vun dëse sensibelen Informatiounen.

An deem Zesammenhang wéilt ech der Ministesch dës Froe stellen:

1. Wéi plangt d'Regierung d'Dataspace4Health mat dem European Health Data Space ze verbannen? Wéi eng Virdeeler gesäit d'Regierung fir d'Lëtzebuurger Gesondheetsversuerger an d'Patienten duerch dës zwou Initiativen?
2. Wéi gëtt d'Verbindung tëscht Obesitéit an Diabetes am Kader vum Dataspace4Health Projet berécksichtegt? Gëtt et Pläng, fir d'Obesitéit als eegene Schwéierpunkt an dëse Projet z'integréieren?
3. Wéi eng Aart vu Gesondheetsdaten, déi fir d'Fuerschung an d'Preventioun vu Krankheete wéi Obesitéit a Diabetes wichteg sinn, ginn am Moment zu Lëtzebuerg gesammelt a wéi ginn dës am Kader vum Dataspace4Health a vum EHDS genotzt?
4. Wéi gëtt de Schutz vu sensibele Gesondheetsdaten am Kader vum Dataspace4Health garantéiert? Wéi gëtt séchergestellt, datt d'Patienterechter am Aklang mam EHDS respektéiert ginn, besonnesch wat d'Recht op Zougang an d'Kontroll vun eegenen Donnéeën ugeet?



5. Wéi eng Moossnamen si virgesinn, fir d'Interoperabilitéit vun de Gesondheetsdaten tëscht de verschiddene Systemer zu Lëtzebuerg an am Kader vum EHDS ze garantéieren?
6. Wéi plangt d'Regierung d'Fuerschung an d'Innovatioun am Beräich vun der Gesondheet duerch d'Notzung vun dësen neie Méiglechkeeten ze ënnerstëtzen, besonnesch a Beräicher wéi Obesitéit a Diabetes?
7. Wéi eng Roll wäert d'Agence eSanté an d'Ëmsetzung vum Dataspace4Health a vum EHDS zu Lëtzebuerg spillen? Wéi gëtt hir Expertise an dësem Beräich genotzt?

Mat déiwem Respekt,



CLEMENT Sven
Deputéierten

